



PROCESVERBAL

Nga mbledhja e jashtëzakonshme e Kuvendit Komunal të Rahovecit, e mbajtur më 12.7.2023 (e martë), me fillim në orën 10:15. Mbledhjen e kryesoi Kryesuesi i Kuvendit, zt. Defrim Kafexhiu. Në fillim konstatoi se të pranishëm janë 28 kuvendarë.

Kryesuesi: Fillimisht, përshëndetje për të gjithë! Të nderuar anëtarë të Kuvendit Komunal, drejtorë të drejtorive komunale, zyrtarë, përfaqësues të mediave, të nderuar qytetarë të Komunës së Rahovecit, kjo është një seancë e jashtëzakonshme e thirrur nga shumica e kuvendarëve. Për këtë mbledhje është propozuar një rendit të ditës.

REND DITE

1. Votëbesimi i Kryesuesit të Kuvendit të Komunës së Rahovecit.

Njësia Nr./Br./No 01 (Kuvendi i Komunës)

Nr./Br./No 119 Nr. i faq./Br.str./No.pg 01/25

Data/Datum/Date 20.07.2023

Kryesuesi – Atëherë po e vendosim në votim miratimin e rendit të ditës, kush është “për”?... Kundër?... Abstenim?... Me 16 vota për, 11 kundër dhe një abstenim, miratohet rendi i ditës për mbledhjen e sotme.

Hasan Përboqi – Faleminderit kryesues! Përshëndetje qytetarë të Komunës së Rahovecit, të nderuar anëtarë të kuvendit komunal, drejtorë, media. E kemi ftuar këtë seancë të jashtëzakonshme sepse kështu e ka paraparë Ligji për Vetqeverisje Lokale dhe jo pse gjendja në komunën tonë është e jashtëzakonshme. E kemi ndërmarrë një nismë për votëbesimin e kryesuesit aktual të kuvendit, jo pse dikush ka diçka personale me të, por për ta dëshmuar përkushtimin tonë që kuvendi i komunës mund të funksionojë shumë më mirë sesa ka funksionuar deri tani. Në këtë kuvend janë marr shumë vendime të rëndësishme, janë miratuar shumë akte nënligjore, janë diskutuar shumë çështje dhe janë trajtuar shumë tema me rëndësi në të mirën e qytetarëve tanë, sepse në fund, të gjithë jemi të zgjedhur nga besimi i qytetarëve. Në rrethanat që jemi sot, është krijuar një shumicë politike e cila ka vlerësuar se janë krijuar mundësitë e reja për të shkuar edhe më përpara, duke pasur funksionim më të mirë me marrëdhënie më të qëndrueshme në programin qeverisës (të fitusit të zgjedhjeve lokale të vitit 2021). Me këtë frymë kemi ardhur në përfundim që kjo përpjekje është për ta mundësuar një zhvillim normal politik i cili rrit edhe më shumë rolin dhe përkushtimin e kuvendit me vendimmarrje të përgjegjshme dhe pa vonesa. Ka ardhur koha për votëbesimin e kryesuesit, janë pjekur kushtet për këtë ndryshim. Kemi mbledhur 16 nënshkrime dhe ju ftojme që të votoni për lirin e kryesuesit nga detyra. Kjo kërkesë është demokratike sepse kemi një shumicë legjitime. Ky është një veprim politik dhe po bëjmë një veprim të nevojshëm dhe të dobishëm. Duke u mbështetur në argumentet e sipërthëna dhe mundësitë reale që kemi para vetes si shumicë politike, i ftoj të gjithë anëtarët e kuvendit komunal që t'i bashkohen nismës tonë.

Leonard Morina – I nderuar kryesues, drejtorë, anëtarë të kuvendit, media, qytetarë. Sot jemi në një seancë të jashtëzakonshme e thirrur nga pozita, duke shprehur mosdurim ndaj vlerave profesionale dhe intelektuale që i zotëron zt. Defrim Kafexhiu. Për ju delegatë nënshkrues të këtij mocioni, mendoj që komuna jonë ka shumë prioritetë më urgjent sesa çështja e shkarkimit të kryesuesit. Kryesuesi, gjatë këtij mandati ka kryer punën në përputhshmëri me rregulloren e kuvendit dhe brenda kompetencave që ia lejon ligji. Kjo i bie që vet fakti që deri më tani kryesuesi që nuk ishte nga radhët e AAK-së, paraqet një gjendje të jashtëzakonshme për ju. Këtu pajtohem sepse qysh para dy viteve keni filluar procesin e shkarkimit të kryesuesit, duke joshur asambleistë nga subjektet tjera përmes favoreve të ndryshme që t'ju bashkëngjiten juve si sasi, por jo si cilësi. Kërkoj nga delegatët nënshkrues të kërkesës së këtij mocioni të tregojnë se në cilat raste kryesuesi e ka shkelur rregulloren. Kjo është një mënyrë klasike për të kontrolluar gjithçka! Edhe kuvendit si organ më i lartë në nivel komunal. Të nderuar asambleistë, ju ftoj që përmes votës ta refuzoni këtë iniciativë për këtë pangopësi politike dhe ju siguroj që po të kishte bërë shkelje kryesuesi, unë si shef do ta inicioja procedurën e shkarkimit, por përkundrazi, kryesuesi është një profesionist i vërtetë dhe i paanshëm në vendimmarrje.

Lirigzon Kastrati – Faleminderit kryesues! I nderuar ekzekutiv, kolegë anëtarë të kuvendit, qytetarë, media. Seanca e thirrur për sot në fakt nuk i shërben interesit të qytetarëve. Kjo seancë është thirrur thjesht për interesa, inate dhe pazare të pushtetit. Për mua është shumëpak e rëndësishme se kush do të jetë kryesues nesër, por më shqetëson fakti që qytetarët e perceptojnë punën e këtij kuvendi për interesa të ngushta politike. Në demokraci është normale që dikush të udhëheq me ekzekutivin dhe dikush tjetër me legjislativin (kuvendin). Si duket pushtetit komunal nuk i mjafton qeverisja të cilën dëshiron ta shtrijë edhe në asamble, duke e shtypur vullnetin e qytetarëve të komunës sonë. Këto veprime e cenojnë rëndë rendin e punës të kësaj asambleje komunale, si institucion i vetëm në të cilin merren vendime të ndryshme në favor të qytetarëve.

Sejfullah Sejfullahu – Nuk dua të ju drejtohem, “i nderuar ky, i nderuar ai” sepse më duket nuk na ka mbetur fare moral në këtë kuvend. Si Sejfullah Sejfullahu po flas, për dy vite jemi familjarizuar në këtë kuvend, duke mos anashkalluar edhe kritikën dhe mosmarrëveshjet. Sot, Rahoveci e ka një fitore të madhe, projekti kryesor për shkarkimin e kryesuesit po realizohet. Kam nisur ta bëj një skenar, për ngjarjet në Kosovë pas luftës, prej rezistencës së Presidentit Rugova dhe Ukshin Hotit deri te zhvillimet që po ndodhin, por në fund më ka humbur vullneti duke i parë seancat e fundit këtu te ne, me sarkazëm, por turp! Defrimi po më dhimbet që është në LVV, në PDK nuk të kisha sugjeruar se edhe për ne nuk po dihet, as mua! Çdo kush i ka votat e veta. Kryesues po bëhet Arbëri, prej një djali të mirë, po vie një më i mirë. Arbër, baca duhet me ta dhënë votën, nuk e di a duhet a jo! Ndoshta edhe nuk ta jap, po nëse fiton, do të them të më floss për një kafë. Arbër, edhe nëse ta jap votën, ti nuk do të besosh, kshuqë jam në pozitë të palakmueshme!

Burim Krasniqi – Faleminderit kryesues! Unë kërkoja që thirrësi i mocionit ta thotë arsyetimin e thirrjes së kësaj seance dhe është për keqardhje kur në arsyetim nuk kishte asnjë vërejtje. Mocioni ka arsyetim, bazë dhe qëllim të përmirësimit përmes një ndryshimi. Këtu qëllimi ka të bëjë me kënaqjen e apetiteve të kryetarit që kur të thotë ndale seancën, me ndalë, kur t’i thotë dikujt “ta dredhi krytë” mos ta incizojë kamera, kur t’i thotë dikujt “kris edhe plumi” mos ta incizojë telefoni dhe kur t’i thotë dikujt unë përdori edhe mjete demokratike “shantazhin” të jetë në heshtje. Nuk ka të bëjë këtu me mospunë të asamblesë komunale. Nëse e marrim rregullore e kuvendit dhe e shikojmë minutazhën e kryetarit, me përgjegjësi të plotë them që i tejkalohet. Në asamble ka edhe gjuhë kërcënuese, përtej asaj ofenduese. Konsideroj që asambleja komunale gradualisht po rrëshqet dhe ndoshta në të ardhmen me një funksionim më pak se 50%. Është për keqardhje kur e shohim që besimin e qytetarëve e kthejmë në shërbim të individit. Po ndodh ajo që ia ka marrë dorën tregtisë (jep diçka, merr diçka). Për keqardhje është “pazar” dhe nuk lexohet ndryshe. Kushdo që vjen kryesues, suksese! Po them që do të jetë kryesues i turpit në zhvillimin e dy viteve tjera të asamblesë komunale.

Sinan Kryeziu – Faleminderit kryesues! U detyrova ta marr fjalën për faktin që ish shefi im, Leonard Morina më sulmoi me dashje, duke thënë që kryetari ka marrë sasi, por jo cilësi. E para e punës, ai ka qenë bartës i listës, e unë me motër kemi shkuar tutje bashkë. U fol është për pazare, herën e parë e kemi pasur një pazar politik me PDK-në (e kemi marrëveshjen me shkrim).

Kryesuesi – Atëherë përshëndetje edhe një herë për të gjithë! Të nderuar qytetarë të Komunës së Rahovecit, anëtarë të kuvendit komunal, drejtorë, media, përfaqësues të organizatave, zyrtarë komunalë. Sot në këtë seancë për shkarkim po ndihem më mirë sesa në seancën e zgjedhjes sime si kryesues. Po ndihem më lehtë se më largohet përgjegjësia ndaj jush dhe më rritet më shumë përgjegjësia ndaj banorëve të komunës sonë. 22 dhjetor 2021 u mbajt seanca për zgjedhjen e kryesuesit të kuvendit komunal. Në atë ditë, gjatë dy seancave dhe pas pesë raundeve të votimit, u zgjodha kryesues me 16 vota. Tani është nënshkruar një kërkesë për seancë të jashtëzakonshme për votëbesimin e kryesuesit nga 16 anëtarë, me disa arsyeime të zbehta edhe pse nuk ka arsye për shkarkim. Aleanca në kuvend, në zgjedhjet e vitit 2021 fitoi 12 mandate. Dhimbja e fortë për fitoren e opozitës, me 22 dhjetor rezultoi me oferta të parezistueshme për Shqipe Kryeziu, e cila u thye e para. Ato pak parime që i kishin mbetur në fund të karrierës në Vetëvendosje, u shlyen për pak pushtet brenda Aleancës, apo jo kryetare e gruas së Aleancës?... Seancat e rregullta filluan në vitin 2022 dhe kështu filloi funksionimi normal i kuvendit komunal. Për kryetarit diktat ishte i vështirë i pranueshëm vullneti i qytetarëve, vullneti i shumicës – shumica e opozitës. Pamundësia e tij për ta udhëhequr seancën përmes kukullës moderuese eskalonte situatën e shfaqte zemërim brutal ndaj anëtarëve të kuvendit. Kryetar që nuk njeh rregullore, statut apo ligj, ndoshta edhe i njeh por asnjëherë nuk i respekton. Ishte seanca e tretë e kuvendit ku kryetari pa respekt e me shfrenim ia “mësyn” foltores dhe ia merr fjalën atij që duhet t’ia jepte. “S’ka me lon guri pa lëvizë, s’ka me lon guri pa

lëvizë, kjo është seanca e fundit që po e udhëheq" këto fjalë u bënë standard sa herë që votoja me përkushtim dhe arsyeshëm në kuvend me votë të dylisht. Këto ngjarje i paraprinin takimeve të natës me "msitni" të votave në kuvend. Duke kërkuar votë edhe nëpër homazhe e varrime "për me hek rrugaqin prej këtu" kështu thoshte ai. E pritshme prej një kryetari diktat. Filloi viti 2023 dhe po fillojnë ofertat e reja për asambleistë, kësaj radhe një kundërshtar i fortë i kryetarit në publik dhe një kundërshtar i fortë i Vetëvendosjes brenda. Dikush që nuk e njohte kryetarin për njeri, e kryetari atë e trajtojke me nënëmim. Por, ja që interesi i bënë bashkë dy minusa, kryetari e publikon një foto pas një marrëveshje të shpejtë. Krismen e asaj fotoje e dëgjuam shpejtë sa që edhe brenda Aleancës u përkeqësua gjendja, por një për shkak të interesit të përgjithshëm, por kryekëput për interes personal se kush po fiton më shumë prej këtij pushteti. Ka burra dhe gra të mira në Aleancë, por zëri i tyre nuk e bën diferencën. Aleanca në Rahovec udhëheq me mandatin e tretë, të dytin radhazi. Aleanca në Rahovec po lë njollë të pashlyeshme për shoqërinë tonë. Degradim, diferencë, përçarje dhe njolllosje të mentalitetit. Këtu të rinjtë nuk kanë shpresë për punësime të drejta, për trajtim të njejtë, nuk ka shpresë për përmirësim të shpejtë sepse Rahovecin po e udhëheqë një parti e shkretë. Teksa qyteti i tëri është në pluhur nga kjo qeverisje pa plan, kryetari me një akrobacion politik që do t'ia kishte lakmi edhe ndonjë shërbim sekret, rekruton edhe një anëtare të kuvendit, të 15-tën, i 14-ti ishte Sinani. Është e padrejtë kur bëhet shfrytëzimi i pasurisë politike për të bërë pazare politike. Një aterim nga lista e pritjes e kishte Florida Bajraktari, u certifikua si anëtare e kuvendit PDK, por e dha betimin si anëtare e Aleancës. Më pëlqen kjo rezyme e ngjarjeve që po i tregoj sepse më krijon nostalgji për këtë kohë që kalova këtu dhe e kam obligim t'i informoj qytetarët se kush po na udhëheq dhe në çfarë forme po e deformon vullnetin e qytetarëve. Kryetari duhet ta mësojë rëndësinë e të zgjedhurëve tjerë, sepse ne nuk jemi emëruar prej tij. E dimë që arsyeja për shkarkim është vetëm forma e qeverisjes së kryetarit, nuk dëshiron ta ketë një organ institucional që ai mos ta diktojë. Dëshiron ta ketë një kryesues, që e dëgjon kur e kujt t'ia japë fjalën, kur të don ta ndalë, kur t'i vendosë pikat në votim e kur ta mbyllë seancën, po dëshiron të jetë edhe kryetar komune edhe kryesues i kuvendit. Kuvendi deri më tani ka punuar mirë, kryetar jo. Kryetari ka hy në obligime kontraktuale 26 milion€, jo kuvendi. Kryetari në këtë proces e ka gjetur edhe një argat të fortë, Armir Vuqitërna, i cili ka arsye të jetë vullnetar, por realisht përfundimisht po e punëson motrën. Për fund, unë Defrim Kafexhiu, Kryesues i Kuvendit, ju falënderoj të gjithë anëtarët e kuvendit komunal për debatet politike, për konfrontimet politike dhe veçanërisht i falënderoj për opozitarizmin dhe konstruktivitetin e treguar kundrejt punës së kryetarit dhe ekzekutivit në përgjithësi. Respekti ka qenë i ndërsjellë. E kam vetëm edhe një lutje për grupin e Aleancës, "ju lutem votoni ashtu siç ju ka thënë kryetari, se ndryshe nuk guxon".

Atëherë po vazhdojmë me procesin e votimit, kush është "për" shkarkimin e kryesuesit të kuvendit komunal?... Kundër?... Abstenim?... Atëherë prezent në sallë janë 27 anëtarë të kuvendit komunal, për shkarkim të kryesuesit nga detyra kanë votuar 16 asambleistë, 10 kundër dhe një abstenim. Ju falënderoj për bashkëpunimin deri tani. E respektoj këtë vullnet për lirin tim nga detyra.

Procesmbajtësi:

Albion Krasniqi

